

Im Tannewald

1.

Es dungglet scho im Tannewald
Und s' schneielet ganz lislig.
Was isch das fir e Liechtli dort,
In sällem klaine Hiisli?
Do isch dr Santiglaus dehaim
Mit sine guete Sache.
Är het scho's Lämpli aazindt
Und duet grad Kaffi mache.

2.

Do pöpperlet's am Lädeli
Und s'Glöggli hört är lüte,
Jezzt wais är scho, war dusse isch
Und was das soll bedite.
S'Chrischtkindli kunnt no zobe
schpoot,
Äs wird en welle schtupfe,
Är mies dr Sagg bald fire nä
Und sini Fingge lupfe.

3.

S'Chrischtkindli sait: Herr Santiglaus,
E schöni Ornig hän-d-er,
Dr Chrischtdaag schtoot jo vor dr Tür,
Hän dirxlen kai Kalendar?
S'brucht Wienachtsbäum in jedes⁵
Huus
Fir viili hundert Kinder.
Dr miend's im Wald no haue hüt,
Dr Vollmond seil euch zinde.

4.

Dr Santiglaus stellt Tasse ab.
Nur nit so gschprängt, Chrischtkindli,
Die Bäumli mien gwiss bsorget si,
Das het no Zyt e Schtindli.
I mecht jezz ämel no in Rueh
Mi Zvieri fertig käue
Und wenn e Tässli gfellig war,
So soll's mi härzlig froie.

5.

S'Chrischtkindli lacht: He nu so denn,
Do bi-n-i nit drgäge, E bizzli öpis
Warms tuet guet,
Uf mine wite Wäge.
Me ka jo denn no allerlai
Abrede und und Usmache,
Was jedes Kind dno soll biko,
Vo däne scheene Sache.

6.

Si sizze gmietlig binenand
Im klaine Schtübli hinde.
Dr Vollmond zindt d'Latärne a
Und luegt ganz haimlig ine.
Er lost gar lang am Fänschterli
Und uf dr Huustiir-Schwelle.
Wenn är nur besser schwäzze kennt -
Är miest's mer gwiss verzelle.